



Sanlok 25 urte

**EUSKARA ERREFORTZUAK
EMATEKO HEZITZAILEAK
BEHAR DITUGU**
(eguerdi eta arratsaldeetan)

ESKATZEN DA:

- Ahozko euskara maila handia izatea.
- 16 urtetik gorakoa izatea

ESKAINTZEN DA:

- Trebatzeko aukera

ORDUTEGIA:

Astelehenetik ostegunera 16:00-19:30

Interesdunek lan poltsan eman behar dute izena:

labur.eus/eilanpoltsa



EXPRESS ESKAINTZAK!

**GRUNDIG GT55824CW
ARROPA LEHORGAILUA**



569 €

- 8 KG karga
- Bero-Ponpa
- Ate itzulgarria
- PET txasis birziklatua



MILARBIRE

Ubitarte, 11 - 943 741 487 - bire@milar.es

Dendaeko prezioak. Produktuak agortu arte.

**LAGUNDUKO AL DIGUZU
ELGOIBARKO IZARRAREN
2024ko **TONBOLA** OSATZEN?**

Aurreko urteetan **TONBOLAK** izan duen estimazioak bultzatuta, abenduaren 24an Elgoibarko Izarraren tonbola jarriko dugu Kalegoen plazan. Ehunka erregalu banatzea da gure desioa, baina horretarako zure laguntza behar dugu.

Animatuko zara tonbolarako erregalua ematera? Animatzen bazara, esan, ahal duzun azkarren, tonbolarako erregalua emateko prest zaudela. **Azaroaren 22a** izango da erantzuteko azken eguna. Eskerrik asko!

Harremanetarako:

elgoibarkoizarra@elgoibarkoizarra.eus

943 744 112



Argitaratzailea:



Babeslea: Laguntzaileak:



Aita Agirre Kulturgunea, 3, 3. ezk.
20870 ELGOIBAR

☎ 943 744 112 - 📞 688 655 658

Publizitatea: ☎ 943 743 704 - 📞 688 769 657

barren@elgoibarkoizarra.eus

barren.publi@elgoibarkoizarra.eus

www.barren.eus

BARRENEK bere gain hartzen du espazio arazoengatik iragarkiak lekuz aldatzeko eskubidea. Barrenek ez du bere gain hartzen Iritzia, Hitz eta klik eta gutunak ataletan adierazitakoen erantzukizunik. **Koordinatzailea:** Ainhoa Andonegi. **Kazetariak:** Ainhoa Andonegi, Asier Orbea, Ainara Argoitia. **Hizkuntza arduraduna:** Ainara Argoitia. **Publizitatea:** Leire Rubio. **Maketatzailea:** Zaloa Arnaiz. **Atari digitaleko arlo teknikoaren arduraduna:** Aitor Lauzirika. **Administraria:** Amaia Arrizabalaga. **Kolaboratzaileak:** Edurne Izagirre, Paula Heras, Ane Astiazaran, Izaro Etxegibel, Jose Ramon Cabrera, Ane Kortaberria, Asier Guisasola, Maialen Sanchez, Lere Kerexeta, Nagore Cancio **Inprimategia:** Gertu Koop.E. **Tirada:** 4.700 ale. **Lege gordailua:** SS-1.038/92 ISSN 1138-1855.



facebook.com/barrenaldizkaria



twitter.com/barreneus



instagram.com/barrenaldizkaria



youtube.com/@Elgoibarrennet

Maialen Sanchez

Idazlea

Herri bat duenak altxor bat dauka



**"Asko dira
beren bizitzako
lehen aldietako asko
herri txiki batean
bizi izan dituztenak"**

Udako oporrak oroitzen lauso gisa agertzen zaizkigu; atzean geratu dira egun luzeak eguzkipean eta bero handiko egunak. Uda modu askotan bizi daiteke, eta denak onak dira, hala aukeratu badugu. Ez dio axola milaka kilometro egiten dituzun zazpi egun hondartza zoragarrietan eguzkia hartzen igarotzeko edo egun horiek penintsulako herri txiki batean familiaren etxean pasatzen dituzun. Zure uda ahaztezina izango da zauden tokian zoriontsu baldin bazara.

Udan, norbere zain dagoen herri bat izatea zein polita den adieraztea nahi dut. Asko dira beren bizitzako lehen aldietako asko herri txiki batean bizi izan dituztenak, lehen lagunak, lehen bihurrikeria, lehen gaupasa, lehen maitasuna... beren bizitzako udarik onenak, herrian igarotako udak, oroimenean geratzen dira betiko eta bizi izan dutenek zorte handia dute. Topalekua beti herri txiki bat izaten da, non familiak etxe zahar bat duen, non aspaldian kideren batek sustraiak botatzea eta bere oroitzen guztiak apal eta hormetan gordetzea erabaki zuten.

Jolas inozenteetan oinarritutako adiskidetasunek, ordugeirik gabeko egun luzeek, lagun taldeko kide guztiak oporleku desiratuena bihurtzen zuten, eta hala izaten jarraitzen du. Talde guztietan, lehengusu astun bat, herriko neskarik ederrena, Madrillgo bat eta euskaldun bat izaten ziren besteak beste, baina jatorriak ez zuen axola; haurrak garenean udan gure kezka bakarra kalean egotea eta jolastea izaten da. Zer sentazio ederra urte luze bat eta gero berriro ere elkartzea!

Iraila iristean ziurrenik inor ez da etxea zaintzen geldituko, baina lur horrekiko maitasuna eta errespetua belaunaldiz belaunaldi kutsatu da eta horregatik, itzultzeko babesleku bihurtu da.

Debabarreneko VIII. raid-a

Morkaiko Mendizale Elkarteko Raid taldearen izenean eskerrak eman nahi dizkiegu Debabarrenako VIII.raid-a antolatzen lagundu diguten guztiei:

Aurreko ekitaldietan bezala, diruz eta bestelako medioz lagundu diguten Elgoibarko Udalari, Kirol Patronatuari, Udaltzaingoari, Udaleko brigadari eta bereziki, brigadako buru den Oskarri. Eskertu nahi ditugu, baita ere, diruz lagundu diguten Danobat eta Alcorta enpresak.

Sariekin lagundu diguten Ainhoa fisioterapia eta Altzola Berazetari, Txillarre eta Mausitxa baserrikoei, eta nola ez, Lizagarar produktuekin beti laguntzeko prest dagoen Asier Lizarralderi ere. Sarituek asko estimatu zituzten banatutako produktu ekologiko eta barazki freskoak.

Anoa postuak eta bazkaria osatzen lagundu diguten Deuko Izarra, Eroski, Amaia fruitu denda eta Ziarda harategiari ere, mila esker. Baita Konporta elkarteari ere. Eta, bereziki, bihotzez eskerrik asko, zortzi ordu luzez sukaldean arituzen Joseba Egiuren sukaldariari.

Eskerrik asko, igarotako lur sailen jabeei eta baso lanetan lagundu zigun Iñigo Loiolari. Baita telazko poltsak eman zizkigun Mondragon Unibertsitateko Susana Azpilikueteri ere.

Probaren segurtasuna bermatzen lagundu diguten Gurutze Gorriko langileei eta nola ez,

guzti hau posible egin duten boluntario guztiei. Zuek gabe, ezinezkoa litzateke horrelako proba bat antolatzea. Eskerrik asko denoi!

Azkenik, eskerrak eman raid familiarrean eta raid nagusian parte hartu duzuen guzti-guztiori. Eskerrik asko bihotzez!

Debabarrenako VIII Raid-eko antolatzaileak

Urriaren 6an Azeptira!

Iritsi da Kilometroak, Gipuzkoako ikastolen jai egun handia. Urriaren 6an ospatuko da Kilometroak Azeptitan. Antolatzaileek adierazi dute dena prest dutela. 1.000 lagun inguruko boluntario taldea antolatu dute. Lau gune izango dira, adin guztientzako ekintzak eta ikuskizunekin: Erronka probak, jolasak, puzgarriak, tailerrak, kale antzerkia, magia, karaokea, yoga, kapoeira, musika taldeak... Jatekoa eta edatekoa ez da faltako.

Azeptira arnasmunez da euskararentzat, eta Kilometroak jaia ere euskaltzale guztientzako arnasmunez izatea nahi dute antolatzaileek: "Euskara erabili eta euskaraz gozatzeko aukera paregabea izango du bertara doan guztiak. Beraz, erabili erruz euskara ibilbidean, kontzertuetan, txosnetan, lagun artean eta ahal duzuen guztietan".

Goazen igandean Azeptira eta gozatu dezagun euskaraz elkarrekin!

A.A.

Ate irekien jardunaldiak Udal Ludoteka eta Udal Gaztelekuan, zerbitzuak gertutik ezagutzeko

Udal Ludoteka

www.elgoibar.eu

Udal Gaztelekua

Urriaren 10ean, 18:00etan.


Urriaren 9an, 18:30ean.

Haur eta nerabeen guraso, tutore, hezitzaileei eta interesa duen edozein herritarri irekia.

San Ignazio,9, sotoa - 20870 ELGOIBAR
943 748 883

ludoteka@elgoibar.com
 @elgoibar_ludoteka

Gabriel Kurutzelaegi, 4 - 20870 ELGOIBAR
943 743 228

gaztelekua@elgoibar.org
 @elgoibarkogaztelekua





Zuen kexak, galderak edo txaloak bidaltzeko: barren@elgoibarkoizarra.eus



943 744 112



688 655 658



Zaborrontzira ezin da edozer

bota: "Mendaroko zaborrontzi baten irudia da ondokoa. Esne kaxak, lixiba poteak... denetarik botatzen du jendeak zaborrontzira, baina zaborrontzia ez da halakoetarako. Horretarako ditugu zabor edukiontziak.



Elgoibarko ikastolatik gora doan bidea zaborrez beterik dago:

"Ikastola atzeko ingurune hori oso egokia da txakurrak paseatzera ateratzeko, baina azken egunotan zabortege bilakatuta dago. Denetariko hondakinak bota dituzte, eta tartean kristalak ere bai, txakurrentzako oso arriskutsuak direnak. Dagokionari garbitzeko eskatu nahi nioke, baina bereziki, hori guztia horra bota duenari esan nahi diot badaudela zabortokiak eta hori ez dela horrelakoak botatzeko lekua. Errespetua, mesedez".



Herriko hainbat gunetako jarlekuak hondatuta daude:

"Kalegoen plazako eta Lekuederreko bi jarleku hondatuta daude. Lekuederrekoa, bereziki, aspaldian dago egoera txarrean, eta uste dugu badela konpontzeko garaia. Eskerrik asko".



Euskaraldiaren laugarren edizioa martxan da



Euskal Herri osoko ekintzaile eta talde eragileak batu ziren joan zen egunean Eibarren, Euskaltzaleen Topaguneak deituriko Euskaraldia ON! topaketan, eta tartean Elgoibarko eta Mendaroko kideak ere izan ziren. Euskaraldiaren laugarren edizioa izango dena udaberrian egingo da lehenbizikoz, maiatzaren 15etik 25era, eta "herritarren aktibazioan lehen pausoak emateko" egin zuten Euskaraldia ON! topaketa. 200 lagunetik

gora bildu ziren Coliseo antzokian: Euskaraldia posible egiten duten boluntarioak, euskara elkarteetako kideak, herritarrak, teknikariak... Bertan, Euskara aktibatzaileen gida-liburua aurkeztu zuten, "Euskaraldia antolatu eta herriz herri herritarrak saretzeko" gida praktikoa. Horrez gain, herriek izena emateko epea zabalik dela jakinarazi zuten. Norbanakoek, ordea, 2025eko martxora arte itxaron beharko dute horretarako.

Urriaren 7an ekingo diote pentsiodunen eta herritarren oinarrizko eskubideen aldeko mobilizazioei

Elgoibarko Pentsiodunen Mugimenduak eta Duintasunak jakinarazi dute urriaren 7an ekingo dietela pentsiodunen eta herritarren oinarrizko eskubideen aldeko mobilizazioei. 12:00etan izango da, Kalegoen plazan. Udazken honetarako hainbat erronka dituztela aurreratu dute, besteak beste, Herri Ekimen Legegilea (HEL) babestea eta Elgoibarko Etengabeko Arretako Gunea (EAG) irekitzeko eskaera plazaratzea. Azaldu dutenez, mobilizazioen helburua ez da soilik eskaera horiek ikusaraztea, "osain publikoko sistema baten aldeko borroka eta guztiontzako



zaintza duinak indartzea" ere helburuen artean jaso dutelako.

'Guria erabili zeinke' egitasmoan parte hartzeko deia egin diete dendariei

Elgoibarko Amatau Mobila taldeak, *Guria erabili zeinke* kanpaina jarri du martxan, Elgoibarko Udalarekin elkarlanean. 8 eta 16 urteko haur eta nerabeei zuzendutako egitasmoa da, eta helburu nagusia haur eta nerabeei sakeleko telefonoa edo erloju mobila erabiltzeko beharra murriztea da. Egitasmoa aurrera eramateko denden beharra daukate, eta egitasmoan parte hartzeko deia egin diete dendariei. Dendariek beraien establezimenduko telefonoa jarriko dute haur eta nerabeen eskura, beharra dutenean erabiltzeko. Parte hartzeko interesa dutenek urriaren 7rako eman behar dute izena labur.eus/gureaerabildezakezu helbidean. Kanpainen parte hartzen duten dendetan identifikazio irudia egongo da jarrita.

Amatau Mobila taldea Gipuzkoako *Altxa burua* ekimenaren baitan sortu du Elgoibarko guraso talde batek, haur eta nerabeek sakelako telefono eta pantailaz egiten duten erabilerak kezkatuta. Udaleko Ongizate eta Gazteria eta Hezkuntza sailek ere bat egin dute taldearekin eta elkarlanean dihardute Interneterako sarbidea duten gailuak ematea berandutzeko estrategia bateratu baten alde.

Joste tailerra antolatzeko bilerara deitu dute Mendaron, urriaren 9rako

Joste tailerra antolatzeko bilera irekia antolatu du In Leike kultur elkarteak urriaren 9rako. Jubilatuen ondoko lokalean izango da, 18:00etan. Josten dakitenak eta josten ikasi nahi dutenak elkartzea da bileraren helburua, tailerrari forma emateko. Bileran bertan adostuko dute eskolak asteko zein egunetan eta zer ordutegitan izango diren. Beste jende batekin elkartzeko, esperientziak trukatzeko eta josten ikasteko tailerra izango dela aurreratu dute In Leiketik; sozializatzeko eta komunitatea sendotzeko espazio irekia, alegia.

Ipini dute Karakaten lapurto zuten mendiak identifikatzeko plakaren ordezkioa



Inguruko mendien tontorrak identifikatzeko jarritako brontzeko plaka ostu zuten duela urtebete Karakate gainetik, eta plaka berria jarri dute dagoeneko. Elgoibarko eta Soraluzeko Udalek jarri dute, baina brontzekoa beharrean, labazko plaka da oraingoa. Empreinte enpresa arduratu da plaka berria egiteaz eta 1.575 euroko kostua izan du.

'Mendaron bizi, Mendaron erosi' kanpaina egingo dute urriaren 7tik 30era

Mendaron bizi, Mendaron erosi! kanpaina egingo dute urriaren 7tik 30era, eta herritarrek deskontuak izango dituzte epe horretan egiten dituzten erosketetan. Bonua erosita, Mendaroko herritarrek 30€ kontsumitu ahal izango dituzte 20€ ordainduta.

Udal-informazioa digitalizatzeko teknikaria behar du Udalak

Udal informazioa digitalizatzeko langile bat kontratazeko lan deialdia egin du Elgoibarko Udalak, Lanbide-Euskal Enplegu Zerbitzuarekin lankidetzan. Deialdi honen helburua da arkitekturan, ingeniartzan edo horiekin lotutako arlo teknikoetan prestakuntza duen pertsona bat kontratatzea, udalerriko argiteria publikoaren sareari buruzko datuak biltzeaz eta digitalizatzear arduratuko dena. Lau hilabeterako kontratua izango da, lanaldi osoan. Iragarkia ikusteko helbide honetan sartu behar da: labur.eus/lanpostuberrria.

Debabarreneko Nekazaritza Bulego berria inauguratu dute Gabriel Kurutzelaegi kalean



Xabier Arruti Lurralde Oreka Berdeko diputatuak inauguratu zuen eguaztenean Eskualdeko Nekazaritza Bulegoa, Maialen Gurrutxaga alkatearekin batera. Gabriel Kurutzelaegi kalean dago egoitza berria, Gaztelekuaren ondoko eraikinean. Bulegoak Debabarreneko 1.600 ustiategi baino gehiagori emango die zerbitzua, eta bulego berria egokituta dago gestioak egin behar dituzten

baserritarrak erraz sar daitezten. Zentro berriak ustiategiaren erregistroari, gidekin lotutako izapideei, animalien altei eta bajei buruzko gestioei erantzuteko balioko du, eta eskura dauden laguntzei eta horiek eskatzeko moduari buruzko informazioa emango du. Gainera, gune horretan bertan Debemen Landa Garapenerako Elkartearen bulegoak ere egongo dira, orain arte Merkatu Plazako eraikinean zeudenak.

Berdintasun Plana egiteko inkesta betetzeko deia egin die Udalak herritarrei

Elgoibarko Udala V. Berdintasun Plana prestatzen ari da eta herritarren parte-hartzeari buruzko inkesta bat egin du, beren ikuspegia partekatu nahi duten 16 urtetik gorako pertsona guztiei zuzendua. Galdetegia anonimoa eta

konfidentziala izango da. Udalaren webgunean aurkituko duzue inkesta formatu digitalean, eta formatu fisikoa, berriz, Aita Agirre kulturguneko sarreran egongo da eskuragarri. Inkesta betetzeko azken eguna urriaren 13ra da.

Txokolate jana izango dute gaur Elgoibarko Jubilatuen Biltokian

Adinekoen hilabetea antolatu du Elgoibarko Jubilatuen biltokiak urrirako, eta egitarauaren barruan txokolate jana izango dute gaur, 17:00etan. Datorren eguaztenean Legazpira egingo dute txangoa, eta hilaren 15ean zine foruma izango dute. 80 urtetik gorako bazkaria hilaren 17an egingo dute, eta horren barruan aurten urrezko ezteiak betetzen dituzten bikoteak omenduko dituzte. Bakarriketak, Mekaren sorrerari buruzko kafe tertulia eta beste txango bat ere egingo dituzte aurrerago.

Horrez aparte, Jubilatuen Biltokitik jakinarazi dute domeka arratsaldetako musika emanaldiak berreskuratuko dituztela. DJ bat arituko da denetariko musika jartzen.

5.000 euro banatuko ditu Txankakuak udazkeneko ginkanan

Udazkeneko ginkana antolatu du Txankakuak urrirako, eta kanpainaren barruan 5.000 euro banatuko ditu saritan: 500 euroko bi sari eta 200 euroko hogei.

Herritarrek txartel bat izango dute, eta kanpainarekin bat egin duten dendetan erosketak egitean zigilua jasoko dute txartelean. Txartela osatutakoan dendetan jarriko dituzten kutxetan sartu beharko dituzte, zozketarako. Kanpainak urriaren 7tik 31ra iraungo du. Asteburu honetan, bestalde, stock azoka egingo dute Txankakuako merkatariek. Atzo hasi zuten, eta gaur eta bihar ere denda atarietara aterako dituzte euren produktuak, prezio merkeagoan.





PELLO SARASUA

'Arantzazu. 36 zm, 5 mende, herri 1' dokumentalaren zuzendaria

✍️ Ainara Argoitia

'Arantzazu. 36 zm, 5 mende, herri bat' dokumentala proiektatuko dute domekan, urriaren 6an, Mendaroko udaletxeko udalbatza-aretoan, 18:30ean. Dokumentalean, Arantzazuko frantziskotarrek lotzen ez diren hainbat altxor ematen dituzte ezagutzera, gure historiaren eta izanaren parte direnak.

“Arantzazuko frantziskotarrek egin duten ekarpenari balioa emateko dokumentala da”

Non du proiektu honek abiapuntua?

Arantzazulab da proiektuaren sustatzailea, Arantzazun bertan dagoen demokraziaren berrikuntzarako laborategia, bere zereginen artean Arantzazuko ondarearen sustapena egitea daukana. Konturatu ziren bazegoela hemen lan bat egiteko ondare inmaterialaren alorrean: frantziskotarren testigantzak jasotzea. Arteman produktorekin jarri ziren harremanetan horretarako eta Artemanekoek deitu zidaten neri. Frantziskotarren konfiantzazko norbait behar zuten, eta nik baneukan harreman hori, 2008tik 2011ra bitartean Baketik Fundazioan lanean aritu nintzenezan egunero ibili nintzelako Arantzazuko Gandiaga Topagunera bueltaka. Esan behar dut hasierako helburua ez zela dokumentala egitea, baizik eta elkarrizketa sakonak egitea, testigantza horiek guztiak jasotzeko. Hogeitaka ordu grabatu genituen, eta gero ikusi zuten hori gizarteratzeko premia, dokumental bat sortzearen beharra.

Arantzazu entzunda gauza asko datozkigu burura. Lotzen dugu erlijio kristauarekin, euskal nortasunaren bilaketarekin, hizkuntzaren berreskurapen prozesuarekin, Oteizaren ekarpen estetiko ideologikoarekin, eztabaidekin... Zer erakutsi nahi izan duzue dokumentalean?

Arantzazuk ertz asko dauzka, bai, eta gai asko biltzen ditu bere baitan. Arantzazulabekoek, baina, gai nagusi batzuk aukeratu zituzten elkarrizketekin hasterako: espiritualtasuna, euskara, artea, natura... Hala ere, material asko bildu genuen eta banuen neuk ere kezka hori: zer kontatu. Baina funtsean, dokumentalaren azpiztitularrean esaten den hori kontatzen da. 36 zm, bost mende, herri bat da azpiztitularra eta spoilerra eginez esango dizut 36 zentimetro direla Arantzazun agertu zen ama birjinaren figurak neurtzen dituenak. Hain justu ere horrekin hasten da istorioa, Ama Birjinaren agerpen horrekin, eta kontatu nahi izan duguna zera da: Arantzazuk eta fraideek Euskal Herriari, 'herri bat' horri, arlo sozial, kultural eta espiritualean egin dioten ekarpena, batez ere azkeneko 70 urteetan, hori baita testigantzetan jaso duguna. Dokumentalak bi parte ditu. Barrura begirako batekin hasten da, komentuari eta frantziskotarren euren bizimoduari begirako batekin. Hor kontatzen da 50eko hamarkadan ume zirela Arantzazura iritsi zirenek

nola bizi duten beren fraide izate hori. Fraideez daukagun irudia hori da, komentukoa, eguneroko bizitza erlijiora eta espiritualitatera bideratua dutenena, baina frantziskotarren espiritualtasuna ez da elizara mugatu, eta hori da bigarren partean kontatzen duguna. Herriarengandik oso gertu egon dira beti frantziskotarrak eta herria oso gertu egon da, aldi berean, Arantzazutik.

Zein izan da, bada, frantziskotarren espiritualtasun horren muina?

San Frantzisko XII-XIII. mendean jaio zen etxe oneko familia baten, baina berak bizimodu apalago bat eramatea erabaki zuen, eta frantziskotarren espiritualtasunaren oinarrian badago hori, naturatik eta pobreengandik gertu egotea, baina batez ere, anaidian bizitzearen garrantzia aipatzen zuten denek galdera hori egin nienean. Frantziskotarrentzat anaidia edo komunitate hori ez da sekula komentura edo Arantzazuko klaustrora mugatu. Anaidia ingurura zabaldua ulertzen dute. Haientzat natura, pertsonak eta arnasdun guztia dira anaidia horretako parte eta horregatik izan dute herriarekin, kasu honetan Euskal Herriarekin, hain harreman berezia. Gizarteak zituen beharrekin oso kontziente izan dira beti eta arlo guztietan eragin dute. Oso berritzaileak izan dira, eta horregatik sortu dira askotan gatazkak ere, bai kanpora begirakoak eta baita barrura begirakoak ere.

Frantziskotarrek egindako ekarpena ikuspegi laiotik zer izan den jakitzeko, elkarrizketatu ditugu fraide ez diren beste pertsona batzuk ere, euskal kulturgintzako erreferenteak direnak. Elkarrizketatu dugu, esaterako, Lorea Agirre *Jakin* aldizkariko zuzendaria, fraideek euskarari egin dioten ekarpenaz; Xabier Euzkitze eta Jon Sarasua, frantziskotarrek humanismotik herriari egindako ekarpenaz; eta Miren Elgarresta Emakundeko zuzendaria, urte askoan al baitari izandakoa eta Nikolas Segurola artzain fraidearekin batera ardi latxaren lanketan eta Idiazabalgo Gazta sormakaren hastapenean aritutakoa.

Fraideekin daukagun konfiantzagatik joan zitzazkizun bila lan honetarako. Jasotako guztitik zer egin zaizu berria edo deigarria?

Baketiken lanean ibili nintzen lau urtean egunero ibili nintzen Arantzazura joan-etorrian,

baina beti esaten dut Arantzazura asko joan arren, Arantzazun gutxi egon nintzela. Askori gertatzen zaigu hori. Jende asko joaten da Arantzazura, baina ezagutu jende gutxi egiten du, ertz asko dauzkalako eta zaila ere egiten delako askotan. Nik ere horixe sentitu nuen lan honi ekin nionean. Alde horretatik dokumental hau egitea aukera paregabea izan da Arantzazu ezagutzeko. Fraideekin konfiantza baneukan maila pertsonalean, baina Arantzazuk barnebiltzen dituen gai guzti hauetaz sekula ez nuen hitz egin haiekin. Konturatu naiz, adibidez, zein berritzaileak izan diren hainbat momentutan eta harritu naute beste zenbait gauzak, esaterako euskararekin izan duten harremanak. Banekien ume zirenean komentuko bizitza gazteleraz zela gehienbat, baina herriarekin euskaraz komunikatzen zirela, argi zutelako herriaren hizkuntza euskara zela, baina harritu nau komentu barruan orain dela hogeita hamar bat urtera arte otoitzaldiak gazteleraz egiten zituztela jakiteak. Non eta Arantzazun, euskara batuaren zimenduak jarri ziren lekuan.

Aipatu duzu tradizioa eta modernitatea uztartzeko ahalegina, bai eta ahalegin horretan sortu diren eztabaidak ere.

Basilika berria eraikitzen hasi ziren garaian iritsi ziren Arantzazura elkarrizketatutako fraideak eta topo egin zuten han Jorge Oteizarekin, Eduardo Txillidarekin, Nestor Basterretxearekin eta Euskal Herriko beste artista askorekin. Oso polita da haien ahotik entzutea zelako harremana izan zuten artista handi horiekin guztiekin. Santutegia berritzeko lanak sortu zuten gatazka ere kontatzen da dokumentalean, labur bada ere. Gaur egun jende asko etortzen da kanpotik Arantzazuko eliza modernista eta Oteizaren

"Frantziskotarrentzat anaidia edo komunitatea ez da sekula komentura edo Arantzazuko klaustrora mugatu eta horregatik izan dute herriarekin, Euskal Herriarekin, hain harreman berezia"

eskulturak ikustera, baina bere garaian sekulako gatazka sortu zuten berritze lanek. Ezezagunak ziren artista gazte batzuei enkargatu zieten lana eta aipagarria da frantziskotarren apustu hori, santutegiko lanetarako konfiantza izatea jende haiengan. Baina denok dakigu apustu horrek zer ekarri zuen. Oteiza proiektuan lanean hasi eta gutxira, haren eskulturekiko errezeloak sortu ziren frantziskotarren artean. [1955an, Erromako Arte Sakratuaren Pontifize batzorde zentralak egindako txostenean oinarrituta, lanak geldiarazi zituen Donostiako elizbarrutiko bikario jeneralak eta Oteizak Arantzazu abandonatu zuen. Urte hartako abuztuaren 30ean bedeinkatu eta zabaldu zuten basilika, apostulu eta pietaterik gabe]. Santutegirako errepide bazterrean abandonatuta utzi zituzten 10-15 urtean Oteizak ordurako tailatuta zeuzkan lau apostoluak eta harrizko beste blokea, eta gatazka zabaldu zen. Miguel Angel Alonso del Valek kontaktzen du hori guztia dokumentalean, Gandiaga Topagunearen arkitektoak. Oso ondo kontaktzen digu, baita ere, basilika zer den. Gaur egun jende asko etortzen da kanpotik basilika ikustera, eta asko dira atarian bertan basilika non den galdezka hasten direnak, harrিতuta. Harritu egiten da jendea, era berean, barrura sartu eta ikustean 600 metro koadroko absidearen erdian dagoen 36 zentimetroko Ama Birjinara joaten dela gure bista. Badu zer bait berezia estruktura handi horrek.

Nola egin dezakegu fraideez dugun ikuspegi estereotipatu hori ahaztu eta jendea aretora eramateko?

Nik ere egin nion galdera nire buruari: zer kontatu nahi dut eta nori, ez baita erraza 25 orduko grabazioa 70 minututara ekartzea. Saiatu gara ekilibrioa bilatzen eta 16 bat urtez gorako publiko zabalarentzako zer bait sortzen, gustagarri egin dakiokena Arantzazu ezagutzen duenari nahiz ezagutzen ez duenari; sinestunari nahiz sinestuna ez denari. Ordubetean kontaktzen denarekin gerta daiteke ezagutzen ez dutenei testuingurua falta izatea tarteren batean, baina funtzionatzen ari da emanaldietan. Egia da, aurreiritziengatik, zaila dela gazte jendea eramatea emanaldietara, baina etortzen diren 20 urtetik 40 urtera artekoak harrিতuta irteten dira emanalditik. Lehenengo parte gehiago da espiritualtasunari eskainitakoa,

"Kristau espiritualtasuna sustatzen duen santutegia eta bila dabilen pertsonarentzako lekua da Arantzazu. Jende ezberdinaren topaleku izaten jarraitzen du, uneoro berritzen ari dena"

baina tarte hori ere jendeak gustura ikusi duela esango nuke, fraideek beren sentimentuetatik kontaktzen dutelako bizi izan zutena. Fraideen artean ere, ezberdin ulertzen dituzte erlijioa eta espiritualtasuna, eta gizarteko gaien inguruan ere iritzi ezberdinak dituzte.

Zer dela esango zenuke dokumentalaren funtsa?

Arantzazuren balioa balioan jartzeko dokumentala da, Arantzazuk Euskal Herriari zer eman dion eta zer ematen dion erakusteko sortutakoa. Nik beti esaten dut, kakotx artean, Arantzazuri esker dauzkagula bi altxor gaur: euskara eta Idiazabalgo gazta. Jendeak ez du lotzen Idiazabalgo gazta izendapena Arantzazurekin, baina egiaz hala da. Artzain eskola han dago, eta Nikolas Segurola zenak lan izugarria egin zuen eta sekulako bultzada eman zion ardi latxari.

Gaur egun zer da Arantzazu eta zer itxura hartzen diozu etorkizunerako?

Kristau espiritualtasuna sustatzen duen santutegia eta bila dabilen pertsonarentzako tokia da, bila ibiltze hori oso zabala izanik. Jende ezberdinaren topaleku izaten jarraitzen du Arantzazuk, uneoro berritzen ari den topalekua. Fraideen anaidia, hori bai, ahuldua dago; jende gutxiago dago eta beren ekarpena ere ezberdina da, baina beraiek sustatzen dituzten gauza asko Arantzazuko Adiskideen Elkartetik ari gara egiten orain. Lan egiteko era moldatzen doa, baina Arantzazuk jarraitzen du izaten orain arte izan dena.

Etorkizuna? Denok egiten dugun galdera da eta erantzunik ez duena. Fraideek eurek ere ez dute garbi, eta dokumentalean zabalik laga dugu galedera. "Izango da" hitzekin amaitu dugu. Zerbait izango da; itxaropen hori daukagu.

Auto elektrikoak bogan

AUTO ELEKTRIKOEN SALMENTA GORANTZ DOA MUNDUAN

Iraunkortasunaz eta karbono-isuriaren murrizketaz gero eta kontzienteagoa da gizartea eta ibilgailu elektrikoak etorkizuneko mugikortasunerako irtenbidetzat nabarmentzen ari da. IEA, Nazioarteko Energia Agentziak emandako datuen arabera, ia hamalau milioi auto elektriko saldu ziren munduan, aurreko urtean baino %35 gehiago. IEAren kalkuluen arabera, 2030erako merkatu gehienetan prezio baliokideak izango dituzte errekontzako autoak eta elektrikoak eta 2035erako hiru autotik bi elektrikoak izango dira.

Zenbat auto elektriko mota daude merkatuan? Gaur egun, darabilten teknologiaren arabera, hiru ibilgailu elektriko mota nagusi daude merkatuan: Ibilgailu elektriko purua/bateriaduna, autonomia hedatuko ibilgailu elektrikoak (errekontza motor txiki bat du bateria kargatzeko) eta ibilgailu hibrido entxufagarria (propulsio elektriko eta konbentzionala uztartzen ditu).

Zenbat balio dute? Espainiar estatuan, lau plazako auto elektrikorik merkeenak 18.000 euro ingurutan saltzen dira, batzuek bestekoa, berriz, 34.000 euroren bueltakoa da. Baina auto elektrikoaren kostua kalkulatzeko garaian, beste hainbat faktore ere hartu behar dira aintzat, hala nola, erregaia



Auto elektrikoentzako kargalekua Azitaingo industrialdean (Eibar). DKT

eta mantentze-lanak. Erregaiari dagokionez, auto elektrikoaren 100 km-ko kostua 2-3 euro ingurukoa da eta gasolinazkoarena, berriz, 9-12 euro bitartekoa. Mantentze-lanen kostua ere dezente txikiagoa da auto elektrikoaren kasuan, gasolinazkoa, diesela edo hibridoa baino, %29, %21 eta %25ekoa, hurrenez hurren. Hortaz, hasierako erosketaren gainkostua 6-7 urtean amortizatu daiteke.

Zer nolako autonomia du? Modeloa eta bateriaren araberakoa da. Halaber, modelo

**2025. URTERAKO
HIRU AUTOTIK BI
ELEKTRIKOAK
IZANGO DIRA,
IEA-REN ARABERA**

berriek karga bakoitzeko 250-500 km bitarteko autonomia izan ohi dute.

Zenbat kargaleku daude Debabarrenean? Auto elektrikoentzako kargalekuak daude bailaran, besteak beste, Eibarren Azitaingo gasolindegia eta industrialdekoa edo Mercadona, Eroski eta Aldi supermerkatuetakoa edota Urbitarte kalekoa, Repsol gasolindegikoa eta Mercadonakoa Elgoibarren

Kargaleku publikoak, pribatuak eta komunitarioak Kargalekuak erabilera publikoko lekuetan daude eta edozeinek erabil ditzake baina, oro har, auto elektrikoak gaeuz eta etxean kargatzen dira. Ibilgailuen kargen % 90-95 garaje partikular edo



komunitarioetan egiten da, ahal dela, gauez, elektrizitatearen kostua txikiagoa delako. Karga-puntu pribatuen kasuan, instalazioa 750-1000 euro bitartean kostatu liteke. Kargalekuak komunitario denean, berriz, kasuistika askotarikoa da eta aukeratu den instalazio motaren arabera aldatzen da kostua. Debegesak Ibilgailu elektrikoak kargatzeko instalazioaren inguruko eskuliburu diseinatu zuten. Gida honen helburua da auzo-komunitateetan ibilgailu elektrikoak kargatzeko instalazioen prozesuari eta inplikazio nagusiei buruzko informazioa ematea, horiek aplikatzeko egin beharreko urratsak zehaztuz.

Diru-laguntzak 2021ean Espainiako Gobernuak Moves III plana onartu zuen auto elektrikoaren erosketak eta kargagailuen instalazioak diruz laguntzeko eta deialdia 2024ko abenduaren 31ra arte izango da indarrean. Kontsultatu laguntzak Energiaren Euskal Erakundearen webgunean.

**DEBABARRENEAN
12 KARGALEKU
ELEKTRIKO DAUDE,
ZORTZI EIBARREN
ETA LAU
ELGOIBARREN**



Energia Bulegoa debabarrendarren zerbitzura

Duela hiru urtetik martxan da Debabarreneko Energia Bulego Birtuala, 2030 Agendaren baitan, bailaran energia berriztagarrien erabilera indartzeko helburuz. Bertan, aholkularitza pertsonalizatua eskaintzen diete herritarrei nahiz enpresei, debalde.

Energia berriztagarrien arloan dauden aukerak (fotoboltaikoa, termikoa, geotermia, arotermia, biomasa...), teiltua birgaitzeko moduak edo berogailu sistemak, kontsumoa eta fakturak optimizatzeko bideak eta energiari lotutako beste hamaika konturen berri ematen dute. 2021etik 70 kontsulta baino gehiago erantzun dituzte eta 100 herritar eta enpresa baino gehiagori lagundu diete instalazioak bideratzen edo kontsumoa murrizten.

Online eta presentzialki

Bulegoak goizero eskaintzen du zerbitzua, online, telefono bidez edota presentzialki. Informazio gehiago Debegesaren webgunean edo 943 82 01 10 zenbakira deituta.





GERMAN TELLERIA

Sanloko presidentea

✍️ Ainhoa Andonegi 📍 Asier Orbea / Sanlo

*“Eskubaloia
probatzen duena
ez da damutzen”*

2023an berritu zuen Zuzendaritza Taldea Sanlo Eskubaloia Taldeak, eta German Telleria (Mallabi, 1971) izendatu zuten presidente. Aurten 25 urte bete ditu klubak, eta ohiko zereginen gain, urteurreneko ospakizunetan murgilduta dabilta. C.D. Elgoibarren barruan hasi zuen bere ibilbidea eskubaloia taldeak, eta 1999an futbol taldetik bereiztea erabaki zuten. Sanlo izena ipini zioten klubari, entrenamenduetan Sallobentera joaten zirelako korrika egitera, eta Jose Ignacio Jauregi izan zen lehenengo presidentea. Mende laurdena pasatu da ordutik, eta zailtasunak zailtasun, eskubaloia "osasuntsu" dago Elgoibarren. 12 talde ditu klubak, bost gizonezkoenak eta zazpi emakumezkoenak, eta horrez gain, Eskubaloia Eskola ere martxan dago. Asteburu honetan Sanlobeer garagardo festa ospatuko dute, eta hori izango da urteurreneko ekintzetan azkena.



Sanlok 25 urte bete dituen honetan, zein egoeratan dago kluba?

Kluba oso ondo dago. Kontuan hartu behar da hemen lanean ari garen guztiak boluntarioak garela eta 25 urte hauetan jende pila batek egin duela lan eskubaloiairen alde. Eskubaloia Elgoibarren osasuntsu dago, indarra dauka, baina gauden lekura iristeko lan handia egin du jende askok 25 urtean. Inplikazio handia dago klubean, eta askok seme-alabek eskubaloia laga ondoren ere lanean jarraitu izan dute.

C.D. Elgoibarren barruan sortu zen eskubaloi taldea, eta duela 25 urte bere bidea egitea erabaki zuen. Zer dela-eta?

Garai hartan Jose Inazio Jauregi zegoen presidente eta futboletik bereiztea erabaki zuten, eskubaloiari garrantzia emateko. Anekdota bezala kontatzen du pezeta baten truke erosi ziotela C.D. Elgoibarri eskubaloi taldea, eta gaur egun oraindik ere pezeta hori ordaintzeko dagoela. Taldeari izena jartzerakoan ere aukera desberdinak egon ziren mahai gainean. Jauregik Atxolin proposatu zuen, baina azkenean entrenamenduetan beti San Lorentzora joaten zirenez korrika, Sanlo izena ipintzea bururatu zitzairen. 25 urte pasatu dira ordutik, eta eskubaloiak egin du bere lekua Elgoibarren. Oraindik futbolak jokalaria asko kentzen dizkigu, mutiletan batez ere, baina pozik gaude eskubaloiak herrian daukan harrerarekin. Aurtengo denboraldian 12 talde ditugu, eta beste hiru talde daude Eskubaloi Eskolan. Jokalari gehiago ditugu emakumezkoak, baina

mutiletan, infantil eta kadeteetan esaterako, justu samar gabilta. Mutilak, normalean, futboleko lekurik gabe geratzen direnean etortzen dira eskubaloiara, oraindik ere beraien lehen aukera futbola da, baina neska asko hasieratik etortzen dira eskubaloiara.

Eskubaloia ezagutzera emateko ekintzak egiten dituzue urtean zehar.

Bai, gure helburua da jendea erakartzea, batez ere, mutilak. Umetatik etortzea da egokiena, harrobia lantzeko, eta saiatzen gara eskubaloia kalera atzeratzen, jendeak ezagutu dezan. Baina futbolak indar handia dauka oraindik, telebistan eta komunikabideetan ere kirol izarra da, eta azkenaldian emakumezkoen futbola ere asko indartu da. Lehia zaila daukagu, baina guk lanean jarraituko dugu, kalean ere zarata ateratzen. Sanlo familia bat da, hemen sartzen dena oso gustura egoten da, eta eskubaloia probatzen duena ez da damutzen. Kirol oso azkarra da, aldaketa asko egin behar izaten dira eta jokalaria guztiek jokatu behar dute. Hori asko gustatzen zaie, denek hartzen

"Eskubaloia Elgoibarren osasuntsu dago, indarra dauka, baina gauden lekura iristeko lan handia egin du jende askok 25 urtean"

dutelako parte eta denek daukatelako jokatzeko aukera. Lehen udako eskubaloi campusa ere antolatzen genuen, eta gustatuko litzaiguke berreskuratzea.

Eskubaloiak Elgoibarren daukan harreraren islada izan zen Vucinic txapelketak utzi zuen irudia. Jokalari pila bat kantxan eta harmailak ere beteta.

Bai, txapelketa horrek daukan harrera sekulakoa da. Talde guztiak oso gustura etortzen dira, eta beste klub batzuetatik ere deitu digute etorri nahi dutela esanez, baina zortzi talde baino gehiago ezin ditugu hartu. Nafarroako Anaitasuna taldearentzat, adibidez, asteburu berezia izaten da. Aubixan hartzen dute ostatu eta oso gustura egoten dira. Pozik gaude txapelketa horrek daukan oihartzunarekin, Elgoibartik kanpora ere Sanlo ezagutzera ematen duelako. Gurean ez ezik, hemendik kanpora ere badauka izena Sanlok, eta jokalari profesional batzuk ere irten dira Elgoibartik; beraz, gu pozik gaude.

Presidente karguan zaude orain, eta zu zara Sanloren aurpegia. Nola daramazu?

Bai, 2023an berritu genuen Zuzendaritza Taldea, eta hamar lagun sartu ginen, denok jokalarien gurasoak, lagunak edo gertukoak. Borondatez ari gara hemen, daukagun onena ematen, eta badakigu denen gustua egitea ezinezkoa dela. Kritikak jasotzen ditugu askotan, baina guk ez dugu ezer fede txarrez egiten. Batzuetan asmatuko dugu eta beste batzuetan ez, baina hobeto egingo duela uste duenak badauka zuzendaritzan sartu eta bere ideiak proposatzeko aukera. Ateak zabalik daude; hemen denok gara boluntarioak.

Urteurrena ospatzeko urtea izan duzue aurtengoa. Nola joan da?

Ondo joan da. Urte hasieran 25. urteurrena irudikatzeke logotipoa egin genuen, eta hori erabili dugu aurtengo euskarri guztietan. Horrez gain, iazko denboraldi amaierako Sanlo Festan klubeko lehendakari izan direnei errekonozimendua egin genien, eta baita aurreko zuzendaritzako kideei ere. Izugarri lagundu digute guztiek, eta eskerrak eman nahi genizkien. Erakusketa osatzeko argazkiak lortzen bereziki lan handia egin dute, eta oso

"Aurrera begira gustatuko litzaiguke seniorren taldeak nazional mailara igotzea berriz ere"

ondo geratu zen. Bideo bat ere egin dugu, eta asteburu honetarako Sanlobeer garagardo azoka antolatu dugu. Azoka hau antolatzeko ere, gurasoen laguntza ezinbestekoa da. Gure asmoa da azoka honetan babesleei eskerrak ematea. Beraiekin harremanak sendotu nahi ditugu, ez izatea dirua ematea bakarrik. Pentsatzen ari gara talde bakoitza babesle duen enpresara joatea, apur bat ezagutzeko zer egiten duten. Elkarlana oso garrantzitsua da. Zapaturako Rallysprintekoek sari banaketa gure karpan egiko baimena eskatu ziguten, eta han egingo dute, eta domekako sokamuturraren ostean ere, txorizoa banatuko dugu, Maalan. Urteurrena amaitzeko eskatuta daukagu baita ere Elgoibar izatea aurtengo Eskubaloi Federazioak ematen dituen sarien egoitza, baina ez dakit emango diguten.

Aurtengo denboraldia ere martxan da. Zein helburu jarri dituzue?

Ahal dela kategoria guztietan mailari eustea da gure helburu nagusia. Nik uste dut helburu lorgarria dela, talde oso politak dauzkagulako. Beste helburu bat da alebin eta benjamin mailetan mutilak erakartzea. Maila horietan zazpi jokalari bakarrik ditugu talde bakoitzean, eta hori oso kopuru justua da. Harrobia indartu behar dugu, gaztetxoak direlako etorkizuna. Aurten arduradun bat jarri dugu eskubaloi eskolarako eta eskatu dugu entrenatzaile titulua ateratzeko teknifikazio ikastaroa Elgoibarren egitea.

Eta, aurrera begira, zein dira zuen asmoak?

Aurrera begira gustatuko litzaiguke talde seniorrak nazional mailara iristea berriz. Alcorta egon zen maila horretan eta ez zer urte erraza izan, baina edozeinek ezin du esan maila horretan egon denik. Emakumezkoak ere nazional mailara igotzea ondo egongo litzateke.

Agustin Irusta omendu dute San Migel jaien antolakuntzan egindako lanagatik

San Migel jaiak ospatu zituzten joan zen asteburuan Aiastian, eta jai batzordeko kideek jaien balorazio positiboa egin dute. Urtero bezala ez ziren falta izan pilota partidak, umeentzako puzgarriak, idi-demak, bolo txapelketa, Haritz dantza taldearen emanaldia... festa eta jai girorako ekintzaz beterik joan zen asteburua, baina horrez gain, omenaldi eta errekonozimendurako tarterik ere izan zen. Agustin Irusta *Berde* omendu dute aurtengoan, urteetan auzoko jaiak antolatzen egindako lanagatik eta "ondorengoei auzoarekiko maitasun hori transmititzeagatik". Javier Arrizabalaga auzoko alkate izandakoaren alabak eta suhiak eman zieten oroigarria. Asteburuko emaitzak eta argazki guztiak *barren.eus* atarian.



Sokamuturra, ezpata-dantza eta salbea Errosarioko Ama Birjinaren jaietan

Errosarioko Amaren Eguna da urriaren 7a, eta horren harira hainbat ekintza egingo dira domekan eta astelehenean Elgoibarren. Hasteko, domeka goizerako, sokamuturra antolatu du Udalak. 08:00etan hasi eta 10:45ean amaituko da. Saka ganadutegiko ganaduak askatuko dituzte King-Kong parean, eta ohiko ibilbidean zehar ibiliko dira. Bukaeran txorizo pintxoak banatuko dituzte Sanlokoek, Maalan.

Sokamuturra amaitu eta gero, Errosarioko Amaren Ezpata-dantza kaleratuko dute Haritz Euskal Dantzari Taldekoek Elgoibarren, XV.urtez. Meza nagusia, goizeko 11:15ean hasiko da. Mezetan, Haritzeko ezpata-txiekiek eliza barruan egingo dute dantzan eta jarraian, behin meza bukatuta, ezpata-dantzari guztiak elizaren



kanpoaldean bilduko dira prozesioari ekiteko. Hortik, San Bartolome kalera abiatuko dira, Elgoibarko Udal Txistulariak lagun dituztela, eta Kultur Etxe parean geldialdia egingo dute, dantzarako. Ondoren, Errosario kalean barrena sartu eta Ama Birjinaren azpian dantzatuko dira. Handik, Kalegoen Plazara itzuliko dira, eta dantzan bukatuko dute eguneko ekitaldia.

Astelehenean, berriz, 20:00etan salbea abestuko dute Errosarioko Ama Birjinaren aurrean.



Dolmenen ibilbidea egiteko irteera antolatu du Debegesak domekarako, urriaren 6rako

Debegesak beste irteera bat antolatu du Soraluzera, Dolmenen ibilbidea ezagutzeko. Bisita gidatua izango da, euskaraz, eta urriaren 6an egingo dute, 10:00etan hasita. Interesa dutenek, baina, izena eman behar dute aurrez. Izena emateko 657 794677 telefono zenbakira deitu daiteke edota info@begi-bistan.com helbidera mezua idatzi.

'Plazan dantzan' ekimena antolatu du Mendaroko In Leike kultur elkarteak urriaren 12rako

Bigarren urtez *Plazan dantzan* ekimena antolatu du Mendaron In Leike kultur elkarteak urriaren 12rako. Bi zati izango ditu egunak, eta bietan EinGo izango dute lagun. Eguerdirako kantu bazkaria antolatu dute Aitzbeltz tabernan. Bazkaritarako txartelak salgai jarri dituzte 25 euroan Morroskillon eta Leire jantzi dendan. Kantuan emango dute bazkalostea, eta 18:00ak aldera irtengo dira kalera, dantzara.



Blues kontzertua antolatu dute Mendaron gaur iluntzerako

Mendaroko VII. Jazz Egunaren baitan blues kontzertua antolatu dute iluntzerako Uztargi tabernakoek, Galletiak gozogintzakoek eta Gararock taldekoek, elkarlanean. Itziar Yague kantari gasteiztarra eta Paul San Martin pianojole donostiarra gonbidatu dituzte eta blues zaharrari omenaldia egingo diote haiek. Ondo ezagutzen dute biek ala biek estilo hori, besteak beste Bessie Smith, Ma Rainey, Victoria Spivey eta Ida Cox abeslariak joan zen mendearen hasieran Ameriketako Estatu Batuetan ezagun egin zutena.

Paul San Martin donostiarrak 30 urte baino gehiago daramatza bluesa jotzen pianoan, eta gaur egun Madrilen bizi den Itziar Yaguek bi disko argitaratuak ditu blues, soul eta r&b estiloetan: *Delicious* (2020) eta *Girl like me* (2023). Yaguek



eta San Martinek beren erreperitorioa ekarriko dute Mendarora, konposizio propio lekua eginda, baina haiek interpretatuko dituzten kantuen artean ez dira blues estilo honetako kanturik klasikoak faltako.

Kontzertua San Agustin aretoan izango da, 20:30ean hasita eta sarrerak 15 euroan jarri dituzte salgai.

Jose Miguel Arranzek irabazi du Mendaroko aire libreko margo lehiaketa




Euskal Herritik bertatik eta Kantabriatik (Espainia) etorritako hainbat margolarik parte hartu zuten zapatuan Mendaroko Udalak antolatu zuen aire libreko margo lehiaketan. Aitor Etxeberría eta Aitor Sarasketa eskultoreek egin zituzten epaimahaikide lanak, eta Jose Miguel Arranzek lanari eman zioten lehenengo saria (700 euroko saria). Iker Mugarrak egin zuen bigarren, eta 500 euro jaso zituen saritan. Fernando de Vicenteren lanak jaso zuen hirugarren accesita eta Rikardo Azkaratek laugarrena, eta 300na euro jaso zituzten saritan. 14 urtez azpikoetan,



hamar gaztetxok parte hartu zuten eta bi sail bereiztu zituzten. A mailan, Izar Alberdiren lanak irabazi zuen, eta B mailan, Aintza Mendikute mendaroarrenak.

Nagusien kategorian bigarren saria eskuratu zuen Iker Mugarraren koadroa zozkatu egin zuen Udalak eta Gorane Salaberriari egokitu zitzaion. Lehiaketako lan guztiak erakusgai jarri dituzte jubilatuen ondoko lokalean eta igandera arte egongo da ikusgai erakusketa, ondorengo ordutegian: goizez, 12:00etatik 14:00etara, eta arratsaldez, 18:00etatik 20:00etara. Argazkiak: **barren.eus**

Maider Rejasek eta Joserra Cabrerak irabazi dute BARRENEK antolatutako udako argazki lehiaketa



Galizian eta Araban ateratako argazkiek irabazi dute BARRENEK antolatutako Udako Argazkien estreinako lehiaketa. Joserra Cabrerarentzat izan da sari nagusia, epaimahaiaren saria. Ongarri Argazkilari Taldeko eta gure erredakzioko kide banak osatu dute epaimahai teknikoa eta Cabrerak O Groven (Galizia) ateratako argazkia apartatu dute jasotako argazki guztien artean. Cabrerak bi lagunentzako otordu bat irabazi du Gabi jatetxean.



Herritarrek ere izan dute, baina, lehiaketarako aurkeztu diren argazki guztien artean gustukuenari botoa emateko aukera, eta Publikoaren sari hori Maider Rejasentzat izan da. Landako urtegiaren ateratako argazki batengatik jaso du saria Rejasek: Errigorako produktu sorta. Guztira, 880 boto eman dituzte herritarrek, eta 87 boto jaso ditu Rejasen argazkiak.

Guztira, 55 herritarrek hartu dute parte lehiaketan, eta 150 argazki inguru bidali dituzte (bakoitzak bost bidal zitzakeen gehienez). BARRENEK eskerrik asko, modu batean edo bestean, lehiaketan parte hartu duzuen guztioi.

LGBTI+ komunitateko elgoibartarren bizipenak bildu dituzte liburu batean eta martitzenean aurkeztuko dute, Lilan


Elgoibarko LGBTI+ pertsonen bizipenen bilketa izenburuko liburua aurkeztuko dute urriaren 8an (martitzena) Lilan, Elgoibarko Emakumeen Etxean, 18:00etan. Elgoibarko Udalaren Berdintasun Sailak argitaratu du liburua, jendarte eraldaketarako pentsamendu kritikoa sustatzea bilatzen duen Hiruki Larroxa kooperatibako Egoitz Arbiol Albenizek lagunduta. 2022an zehar hainbat elgoibartarrei egindako elkarrizketak dira liburuaren oinarria, eta lekukotzok erakusten dute Elgoibarren

ere heteroaraua indar handiko egitura dela eta egitura horrek eragina duela herritarren gorputz, nortasun, bizi itxaropen, hautu, rol eta jokaeretan. "Zer egin daitekeen eta zer ez mugatzen du heteroarauak; zer den onargarrria eta zer ez zehazten du; zer irudikatu daitekeen eta zer ez markatzen du. Baina batez ere 'gu' bat definitzen du, 'normala', desiragarria, eta 'bestea' seilatzen du", jaso dute hitzaurrean. Liburua aurkeztu ondorenerako Divina Comediaren *Soy una buena persona* bakarrizketa ere lotu dute.

Egutegirako argazki lehiaketan parte hartzeko azken egunak

2025eko egutegia osatzeko argazki lehiaketa antolatu dute Elgoibarko Udalak eta Ongarri Argazki Taldeak aurten ere, eta martitzenean, urriaren 8an, amaitzen da lanak aurkezteko epea. Lehiaketarako gaia *Elgoibar, elkar zaintzen duen herria* da aurten. Elgoibarren jai, bizi, ikasi edo lan egiten dutenek parte hartu ahal izango dute lehiaketan eta aurkezten diren argazki guztiak Elgoibarren egindakoak izan beharko dira nahitaez. Hamahiru argazki sarituko dituzte, eta saridun bakoitzak 80 euroko bonua jasoko du. Informazio gehiago behar duenak Elgoibarko Udaleko Euskara Sailean eskuratu dezake: 943 744 366 / euskara@elgoibar.eus.

Egur arte tailerreko ikasleen lanak jarriko dituzte ikusgai, Elgoibarren



Gaur jarriko dituzte ikusgai Egur arte tailerreko ikasle helduen artelanak Elgoibarko Kultur Etxeko erakusketa-gelan eta hilaren 11 arte egongo dira ikusgai, 18:30etik 20:30era. Margolanak, marrazkiak eta akuarelak izango dira bertan ikusgai. Era berean, urriaren 18an beste erakusketa bat zabalduko dute, Egur arte tailerrera margotzera joaten diren umeen artelanekin. Udako tailerretan zein ikasturtean zehar egindako lanak jarriko dituzte erakusketan, 4 eta 16 urte bitarteko ikasleenak. Erakusketa hori hilaren 26ra arte egongo da ikusgai, 18:30etik 20:30erako ordutegian.

Bestalde, Egurretik jakinarazi dute hasi berri dutela ikasturtea, baina norbaitek interesa badu aukera daukala oraindik izena emateko 666 557 538 telefono zenbakira deituta.

Hezur museoak bi eguneko egitaraua osatu du 20. urtemuga ospatzeko



Elgoibarko Hezur Museoak 20 urte bete ditu, eta ospatzeko, bi eguneko egitaraua antolatu dute urriaren 12 eta 13rako (zapatu-domekak). Zapatuan, urriaren 12an, 10:30ean zabalduko dute atea eta ordubetez museoa bisitatzeko aukera izango dute hala nahi dutenek. Ondoren, 11:30etik 12:30era, harria zizelkatzen erakutsiko du Mikel Agirrek, eta arratsalderako, historiaurreko jarduerak lotu dituzte. *Egin historiaurreko lanabesa* lehiaketa ere antolatu du Hezur museoak 20. urtemugaren harira, eta egun horretan, 17:00etarako, eraman beharko dira lanak. Aurrez, baina, izena eman beharko da 650 353 566 telefono zenbakira whatsapp idatzita. Urriaren 7a da izena emateko azken eguna (astelehena), eta izena emateko mezuan izen-abizenak eta adina zehaztu beharko dira. Sari banaketa ekitaldia urriaren 12an bertan egingo dute, 18:30ak aldera.

Biharamunerako, urriaren 13rako, ere antolatu dute ekintza bat. Hasteko, 11:00etan, diana joko dute historiaurreko lanabesak erabilia. Idortorbeko zelaian joko dute diana. Antolatzaileek aurreratu dute euria egingo balu, bertan behera utziko luketela ekintza, eta museoa zabalduko luketela ordu horretan.



125 lagun lehiatu dira Debabarreneko raidean

Debabarreneko Raidaren zortzigarren edizioa jokatu zuten joan zen zapatuan Izarraitz eta Karakaten barrena. Abentura raidean 31 bikote lehiatu ziren eta 63 lagun, 25 taldetan, familia raidean. Proba nagusian lehiatu ziren 62 lagunak Aittolako aparkalekutik abiatu ziren eta Xoxote eta Erlo inguruetan egin zuten trekking ikusgarriarekin berotu zituzten hauspoak eta giharrak. Bikote gutxi batzuek lortu zuten ibilbide guztia osatzea, hau da, 20 kilometroko ibilbidea oso-osorik bukatzea, lau orduetik gorako trekkinga izan baitzen. Bestelako estrategia erabili zuten beste parte-hartzaile batzuek: indarrak gorde eta ibilbide motzagoa

egin zuten, baliza batzuk hartu gabe lagata. Aittolan amaitu zuten trekking proba. Raidaren bigarren zatian mendiko bizikletan aritu ziren Irukurutzeta eta Karakate arteko ibilbide lokaztuetan, lurrak bigun baitzeuden aurreko egunetan eginiko euriagatik. Parte-hartzaile batzuek Azkarate eta Sallobente inguruetatik igarotzen zen ibilbide xamurragoa aukeratu zuten. Gabarra Cobi taldeko Aitor Anabitarte eta Jon Ander Pikaza izan ziren probako irabazleak. Portugaleteko eta Berangoko kirolariek 65 puntu batu zituzten 6 ordu, 48 minutu eta 21 segunduko denboran. Euren ahalegina kopuruetara ekarriz gero, 20 kilometro egin

Entrenamenduetarako beste zelai bat, Mintxetan

Mintxetako futbol zelaiak entrenamenduetarako bi futbol zelai ditu orain, albo banatan. Igerilekuen aldean dagoen berdegunea modukoa egin dute bestaldeko atearen atzean, eta dagoeneko erabiltzeko prest dago. Belar artifizialezko berdegune berriak 1.340 metro koadroko azalera du (40 x 19), eta eraiki ahal izateko atletismoan aritzeko bertan zegoen zuloa kendu zuten, gainean belar artifiziala jartzeko. Jarri duten soropil berria Anoeta estadioan eta Zubietako entrenamenduzelaietan erabiltzen duten mota berekoa dela zehaztu dute. Partiden aurretik entrenamenduak eta beroketak egiteko erabiliko dute berdegune berria, eta herritarren aisialdirako ere erabilgarri egongo dela jakinarazi dute udaletik. Era berean, Mintxeta



Atletismo Taldeak ere emango dio erabilera, eta Udal Kirol Patronatuak aerobik eta Elgoibar Sasoian programetarako erabiliko du. 42.000 eurokoa izan da inbertsioa (BEZ barne).



zituzten saltaka eta 30 kilometro mendi bizikletaz; 2.400 metro baino gehiagoko desnibel positiboa pilatuz. Bonjour Getxo taldea sailkatu zen bigarren postuan eta Peña Guara taldea hirugarrengoa. Talde mixtoetan zortzi talde lehiatu ziren eta Euskalraid izan zen onena. Emakumezkoen taldeak bi izan ziren eta Brujuleandok eskuratu zuen garaipena. Proba amaitu ostean, parte-hartzaile guztiek elkarrekin bazkaldu zuten Maalako parkean. Antolatzaileek nabarmendu dutenez, hainbat lekutatik etorri ziren parte-hartzaileak. "Iparraldetik, Galizia edo Huescatik etorritako bikoteak eduki genituen eta hemen Debarrenakoak ere bai hamar kirolari, Elgoibar, Mendaro eta Debakoak". Morkaiko Raid taldeak eskerrak eman dizkie parte-hartzaile guztiei eta antolakuntzan laguntza eman dieten erakunde, denda eta pertsona guztiei. 🐾 Morkaiko Raid taldea



Bazkide leialenak sarituko ditu C.D. Elgoibarrek



Bazkide txartelak banatuko ditu C.D. Elgoibarrek urria amaitu bitartean Mintxetan dituzten bulegoetan: astelehenetik eguenera, 18:30etik 19:30era bitartean. Gainera bazkideen datuak eguneratzeko probestuko dute txartel banaketa. Era berean, lehenengoz bazkide egin nahi duten herritarrak ere animatu dituzte bazkide egitera edota edozein zalantza argitu nahi izanez gero Mintxetara joatera. Bazkide txartelek berrikuntza bat izango dute, QR kode bat, besteak beste, partida egunetan kirol gunerako sarrera eta irteerak kontrolatzeko. Bazkide leialenak saritzeko zozketa egingo dutela ere jakinarazi dute klubetik, hala, bi hilean behin, bazkari/afari bat zozkatuko dute futbol zelaira gehien joaten diren bazkideen artean.

Egun gehiago; erabiltzaile gutxiago



Mintxetako udal igerilekuak iaz baino hamabost egun gehiagoan zabalik egon diren arren, 7.000 erabiltzaile gutxiago zenbatu dituzte. Iaz 47.401 erabiltzaile izan zituzten, hiru hil eta erdiko denboraldian; eta, 40.210 erabiltzaile zenbatu dituzte aurten, lau hilabeteen: ekainaren 1etik irailaren 29ra bitartean. Elgoibarko Udalak positibotzat jo du denboraldia, eta klima moduko kanpoko faktoreei egotzi die erabiltzaile kopuruan izan den beherakada. Era berean, denboraldia luzatu izana ideia ona izan dela uste dute eta neurri horri eutsi nahi diote hurrengo urteetan. "Baldintza

meteorologikoak, batez ere abuztuan eta irailean, ez ziren aldekoak izan, eta horrek eragin nabarmena izan zuen erabiltzaileen kopuruan", arrazoitu dute. Ekainean 10.151 pertsona izan ziren; uztailean, berriz, 19.157 erabiltzaile izan ziren. Abuztutik aurrera, bisitari kopurua izugarri jaitsi zen: 9.581 pertsona hil horretan, eta 1.321 baino ez irailean. Bainu denboraldiko egunik jendetsuena ekainaren 25a izan zen, 1.435 erabiltzaileekin. Bestalde, abuztuan ez zen 1.000 erabiltzaile baino gehiagoko egunik izan, eta irailean, 22 egunez, eguneko 50 pertsona baino gutxiago zenbatu zituzten.

Elgoibarren erabakiko da Euskadiko Rallysprint txapelketa

Zortzi proba ditu 2024ko Euskadiko Rallysprint txapelketak eta Elgoibarko Rallysprinta izango da azkenengoa. Azkoitia eta Elgoibar arteko Azkarate mendateko errepide zaharrean jokatu dute proba, bihar, eta ibilgailuek Azkoitian izango dute irteera lerroa; zehazki, Olan baserrirako bidegurutzearen ingurutik aterako dira autoak Elgoibar aldera, 14:00etan. Elgoibarko Sallobenterako bidegurutzetik gertu izango dute helmugako marra, 8,65 kilometroko ibilbidea osatu eta gero. Hiru txandatan lehiatuko dira pilotuak, erlojupekoan. Emozioa ziurtatuta dago lehen bi sailkatuek baitituzte txapela irabazteko aukerak. Ikullu Razing taldeko Iker Exeberria (BMW M3) gidari ultzamarrak 148 pilatu ditu orain arte jokaturako zazpi probetan, eta 131 puntu ditu liderarren taldekide Aitzol Apalantza (Hyundai i20 R5) errezildarrak. Apalantzak



jarraian irabazi ditu azken hiru rallysprintak: San Migelgoa, Eskoriatzakoa eta Aramaiokoa. Aldiz, kopilotuen txapelketan, Olatz San Miguelek ziurtatuta dauka txapela, orain arte batutako 135 puntuei esker. Alain Agirre bigarren sailkatuak 95 puntu ditu, eta ez dauka aukerarik lehen postua eskuratzeko.

Euskal Kopako finala jokatu du Malape taldeak

Sanloko senior emakumezkoen talde nagusiak, Malape Tabernak, Euskal Kopako Finala jokatu du. Elgoibartarrek Zuazo taldea kanporatu zuten finalerdian. Luzapena jokatu ostean, 31-34 irabazi zuten Barakaldon jokatu tako neurketa. June Zubiaurre eta Nahia Urbiola izan ziren Malapeko golegile onenak, 11 eta 7 gol sartuta. Beste finalerdian Urdaneta taldeak lortu zuen finalerako sailkatzea, Mek Eibar taldeari 24-25 irabazita. Finala liga bukaeran jokatu dute, maiatzean, oraindik zehazteke dagoen egunean eta lekuan. Malapek urriaren 13an hasiko



du Liga txapelketa Erreterian, Ereintza taldearen aurka. Senior gizonzkoen Alcorta Forging Group taldeak ere etxetik kanpo hasiko du liga domekan, Muskizen, Petronor Muskiz taldearen aurka.

Bestalde, gogoratu, atzotik zabalik dagoela Sanloren Garagardo azoka Maalan eta domekara arte egongo dela irekita.

Kirol egokituko jardueren ikasturtea abian da

Elgoibarko Udalak, Gipuzkoako Kirol Egokituen Federazioarekin, Gizarte Zerbitzuen Sailarekin eta Kirol Patronatuarekin elkarlanean, aniztasun funtzionala duten haur eta gazteei zuzendutako jarduera fisiko egokituen programa jarri du martxan hogeigarren urtez. Programa honen helburua da parte-hartzaileen inklusioa eta ongizatea erraztea, kirola eginez. Urriaren 1ean hasi ziren eta 2025eko ekainera arte arituko dira kirola eginez, institutuko gimnasioan egingo dituzten saioetan. Astean behin batzen dira, martitzenetan, bi taldetan

banatuta: Lehen Hezkuntzakoak 17:00etan eta DBHkoak 18:00etan. 6 eta 21 urte bitarteko haur eta gazteei zuzenduta dago. Aurreko edizioan Elgoibarko zortzi haur eta gaztek parte hartu zuten, eta aurten kopuruak gora egitea espero dute. Asteroko jarduera horrez gainera, igeriketa egokituan aritzeko aukera ere badaukate. Iaz 11 gaztek hartu zuten parte.

Informazio gehiago nahi edo behar duenak edota izena eman nahi duten familiek 943 462 514 zenbakira deitu edo info@gkef-fgda.org helbidera idatzi behar dute.





Mikel Leon
inmomikel@gmail.com

747 459 343
 San Ignazio kalea 1,
 20870 Elgoibar

 [@mikel_inmobiliaria](https://www.instagram.com/mikel_inmobiliaria)

ETXEA SALGAI: Santa Ana kalean, 185.000€




LANA

Eskaerak

LH1etik LH6ra arteko ikasleei ingeles eskolak emateko prest nago. First titulua dut.
688 713 497

Gaixoak edo adinekoak zaintzeko prest nago. Erizain laguntzaile titulua dut eta baserrietara joateko autoa ere bai. Esperientzia handia.
602 834 107

Adinekoak zaintzeko prest nago. Erizain titulua daukat eta esperientzia handia. Ospitaletan zaintza lanetan gauak pasatzeko ere prest. 626 858 316

LH eta DBHko ikasleei ingeles klase partikularrak emateko prest nagoen neska elgoibartarra naiz. Esperientzia daukat. 674 463 800

Adinekoak zaintzeko prest nago, etxeko langile moduan. Asteburuetan ere bai. Esperientzia handia daukat eta erreferentzia ezin hobekak eskaini ditzaket. Berehala hasteko prest.
632 711 473

Astelehenetik ostiralera, arratsaldean lan egingo nuke, adinekoak zainduz edo etxeko lanak eginez.
620 757 528

Pintore lanetan esperientzia handia daukat. Elgoibarren zein inguruko herrietan lan egiteko prest nago.
634 155 697

Adinekoak edo umeak zaintzeko prest nago. Esperientzia handia dut. Orduka edo jardunaldi osoz lan egiteko prest nago.
611 215 176

Adinekoak zaintzeko prest nago, orduka. Gauetz ere lan egiteko prest, etxean zein ospitalean.
631 425 686

Etxeko garbiketa lanak egiteko prest nago. 624 534 735

Adinekoak zein haurrak zaintzeko eta garbiketa lanak egiteko prest nago. Orduka, egunez.
604 205 271

Eskaintza

Mekanizazio lantegi baterako langile bila gabilta. Ez da behar ezagutza berezirik, baina ezinbestekoa da pertsona dinamikoa eta eraginkorra izatea. Denboraldi motzeko lanpostua da, abenduak 19ra arte. Berehala hasteko postua. Bidali CV: comercial@ajubita.com

BESTELAKOAK


Gehienez hektarea bat duen lursaila erosiko nuke, Elgoibarren edo inguruan, ortua prestatzeko.
696 295 098

KINTOAK

1948an jaiotakoek kinto bazkaria egingo dute urriaren 12an. 12:00etan batuko dira Kalegoen Plazan. Interesatuak 70€ ordaindu behar dituzte kontu honetan urriaren 10erako, izen-abizenak zehaztuz: ES70 30350007250071145338

  <p>ROSA Mª PINTADO</p> <p><i>Etaldeen Administrazioarako-Gratu ikasketen arduraduna Alcalá de Henaresko Unibertsitatean, eta Gipuzkoa, Bizkai eta Arabako, Errioxako eta Kantabriako ikastetxeetan. Zuzenbidean lizentziatua. Kolegiatu zenbakia: 749</i></p> <p>660 969 679 rosapf@telefonica.net</p>	<p>Gure komunitatean erabilera turistikorako etxebizitza bat dago. Jakin nahi nuke komunitateko kuota igo dakioken etxebizitza honi ematen zaion erabilera bereziagatik.</p> <p>Araudiak, jabeen eta kuoten hiru bostenek hala adostuta, aukera ematen du finkan turismo-errentamendua debekatzeko eta gastu komunaren %20 -rainoko osagarri bat ezartzeko. Egoera hori Jabeen Batzordearen erabakitik aurrera aplikatu daiteke, eta inoiz ez atzera eraginezko ondorioekin. Jabeen eta kuoten ehuneko horiekin batzar berri batean onartzen bada, igoera une horretatik aurrera aplikatuko da eta jarduera horiek egiten dituzten guztientzat izango da, unean egiten ari direlako edo gero lizentzia lortzen dutelako. Legeak esaten du gastu-kuota bereziak ezar daitezkeela edo etxebizitzako gastu komunaren partaidetza handitu daitekeela, jarduera hori egiten denean, lizentzia noiz lortu zen bereizi gabe. Neurri hau jada erabilera turistikoko etxebizitza gisa erabiltzen direnentzat pentsatuta dagoela ulertuta. Kontuan hartu behar da gainerakoei, erreforma egin zenetik debekatu ahal izango zaiela, betiere, quorum hori lortzen bada; aldez, dagoeneko jarduera garatzen ari direnei komunitateko kuota soilik handitu ahal izango zaie.</p> <p>Ondorioa: igoera, Jabeen Batzordean hala erabakitzen bada, jarduera egiten den etxebizitza guztietarako izango da. Lizentzia noiz lortu zen kontuan hartu gabe, baina akordioa hartzen den unetik aurrera bakarrik aplikatuko da.</p> <p>AHOLKULARI KOLABORATZAILEA San Bartolome, 2</p>
--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------	-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------




Argazkiak eguazten eguerdia (12:00ak) baino lehen ekarri behar dira BARRENEKO bulegora, barren@elgoibarkoizarra.eus e-postara edo  **688 655 658** bidalita.



Martin!
Astelehenean 6 urte potolo beteko dituzu! Zorionak, etxeko denon partez. Patxo handi-handi bat.



6 urte handi, **Jare!** Zorionak, eta muxu potolo bat, denon partez.



Zorionak, **Aiur!** Bihar 9 urte! Disfrutatu zure eguna. Asko maite zaitugu.



Zorionak, **Hiart,** urriaren 8an 9 urte beteko dituzulako. Ospatuko dugu behar den bezala. Muxu handi bat, lagunen eta etxekoen partez.



Aunitz urtez, **Xabier!** Gaur 30 udazken ospatuko dituzu gurekin, eta hilabete honetan doktoretza amaiera ere ospatu ahal izanen duzu! Biziki maite zaitugu. Zure familia.

Erretratu bakarreko agurra: 4,50€. Argazki bikoitza: 7€.
Hirukoitza: 9€. Hiru lagunetik gorako taldeak: 15€.

ELGOIBARKO IZARRAKO BAZKIDEENTZAKO PREZIOAK
Erretratu bakarreko agurra: 3,50€. Argazki bikoitza: 6€
Hirukoitza: 8€. Hiru lagunetik gorako taldeak: 12€.



KONTSULTATEGIA

Zer da ahoko irakuzketa?

Hortzak eskuilatu eta hortzetako haria erabili ondoren erabiltzen da ahoa garbitzeko likidoa, ohiko higieina



osatzeko. Bere funtzio nagusia germenak eta bakterioak desagerraraztea da, nahiz eta formulazioaren arabera haien propietateak ezberdinak izan. Garrantzitsua da argi izatea ahoko irakuzteak ez duela, inola ere, hortzak eskuilatzea edo hortzetako haria erabiltzea ordeztan, biak ezinbestekoak baitira bakterio-plaka eta lertzoa ez metatzeko.

Zein kolutorio da egokiena nire aho-hortzetako osasunerako? Hortz-irakuzketa ongi aukeratzeko, ezinbestekoa da espezialista bati galdetzea, zein den guretzako kolutorio egokiena.

Adibidez, fluor asko duten kolutorioek txantxarra prebenitzen laguntzen dute. Klorhexidina dutenak ere badira; osagai horrek bakterio-plakari eta halitosi-arazoei (hats txarra) aurre egiten laguntzen du. Hortzen sentikortasuna arintzea edo hortzen jatorrizko tonua berreskuratzen laguntzen duten propietate zuritzaileak dituztenak ere badira.

Hortz-hagin osasuntsuak ahalik eta denbora luzeenean izateko, ezinbestekoa da hortz-higieneko errutina batzuk mantentzea hortzak eta oiak egoera onean izateko.

ALDAZ HORTZ KLINIKA

San Bartolome, 22 - 20870 Elgoibar
iyd@dentalaldaz.com

943 366 377

4 BARIKUA

Denden ordutegian Stock azoka. Txankakuak antolatuta, dendan atarietan.

16:30 Odol ateratzea, Elgoibarko jubilatuen biltokian. Txanda hartzeko: 623 328 408

18:30 Egur arte tailerreko ikasle helduen lanen erakusketa. Kultur Etxean.

20:30 Blues kontzertua. Paul San Martin eta Itziar Yague. San Agustin kulturgunea. Sarrerak 15 eurotan jarriko dituzte salgai.

5 ZAPATUA

Denden ordutegian Stock azoka. Txankakuak antolatuta, dendan atarietan.

14:00 Elgoibarko rallysprinta. Azkoitia eta Elgoibar artean, Kastinparro Racing Taldeak antolatuta.

6 DOMEKA

10:00 Dolmenen ibilbidea. Bisita gidatua, Karakate gainean hasita, euskaraz. Izena emateko: 657 794 677 edo info@begi-bistan.com.

7 ASTELEHENA

18:00 Aholkularitza: Etxeko lanak eta zaintzak arduraz kontratatzea. Merlin Medinarekin, Lilan. Saio irekia, gaztelaniaz.

20:00 Errosarioko Ama Birjinaren salbea. Errosario kalean.

8 ASTEARTEA

17:00 'Paperezko hegoak' irakurketa kluba, Peru Magdalenarekin. LH4, LH5 eta LH6ko umeentzat. Udal Liburutegian.

18:00 Aurkezpena: Elgoibarko LGTBI+ pertsonen bizipenen bilketari buruzko liburua aurkeztuko dute. Lilan. **Segidan**, bakarrizketa: 'Soy una buena persona. Divina comedia'. Lilan, gaztelaniaz.

9 ASTEAZKENA

18:00 Joste tailerrerako bilera, Mendaron, jubilatuen ondoko lokalean.

18:30 Ate irekiak, Elgoibarko Gaztelekuan.

10 EGUENA

18:00 Ate irekiak, Elgoibarko Ludotekan.

11 BARIKUA

18:30 Kafe tertulia: '7. artea'. Haizeak antolatuta, Loredi Salegirekin, Lilan.

SANLOBEER GARAGARDO AZOKA (MAALAKO PARKEA)

4 BARIKUA

18:00 Irekiera.

22:00 Musika zuzenean: Kitziki taldearen emanaldia.

00:00 Bingo solidarioa.

01:00 Dantzaldia.

5 ZAPATUA

12:00 Irekiera.

22:00 Musika zuzenean: Azkaiter Pelox taldearen emanaldia.

00:00 Bingo solidarioa.

01:00 Dantzaldia.

6 DOMEKA

12:00 Irekiera.

14:30 Bazkaria: Paella jana.

17:30 Amaiera.

ERROSARIO KALEKO JAIK

6 DOMEKA

07:45 Dultzaineroen diana. Elgoibarko kaleetan zehar.

Jarraian, sokamuturra. King-Kong-en hasita, Saka ganadutegiaren eskutik.

11:15 Meza Nagusia, San Bartolome parrokian.

Segidan, Errosario Kaleko Amaren ezpata dantza, Kalegoen plazan hasita. Haritz EDT-k eta Udal Txistulari Taldeak antolatuta.

Zinea (Herriko Antzokian)



'Odio el verano'

4 barikua: 19:00
 5 zapatua: 19:00 / 22:15
 6 domeka: 19:00
 7 astelehena: 21:00

'Padre no hay más que uno 4'

6 domeka: 16:30

'La casa en llamas'(Ongarri zinekluba)

9 eguaztena: 21:00

**2024ko
 botika
 ordutegiak:**

09:00-13:00 / 16:00-20:00
 GUARDIAK:
 Egunez: 09:00-22:00
 Larunbatak: 09:00-14:00 (■)

URRIA

4 BARIKUA	■ Oruesagasti
5 ZAPATUA	Barrenetxea
6 DOMEKA	Barrenetxea
7 ASTELEHENA	■ Soto
8 MARTITZENA	Garitaonandia
9 EGUAZTENA	Arriola
10 EGUENA	■ Fernandez
11 BARIKUA	Yudego

2024 urte guztian, gauzez:
Lekunberri Alberdi, Mikel Isasi, 31 (Eibar)
 943 204 230

■ Fernandez: Herriko Enparantza,4 Garagartza (Mendaro) 943 756 142	■ Soto: Rekalde, 1 (Soraluze) 943 751 638	■ Oruesagasti: Kalebarren, 9 (Soraluze) 943 751 384
-----------------------------------------------------------------------------------	----------------------------------------------------	--------------------------------------------------------------



**Ba al duzu konpondu beharreko arroparik?
 Ekarri, eta berri-berri utziko dizugu, zeure neurrira.
 Jantzigintzarako makina bereziak ditugu,
 edozein ehun konpondu ahal izateko:**

**PUNTUZKO EHUNAK, TXIRRINDULARITZAKO MAILOAK ETA KULOTEAK,
 LARRUA, ZETA ETA ABAR LUZE BAT...**

San Roke kalea, 20 - Elgoibar - 943 744 457 - 685 756 978 - www.textillagunak.com



**Komertzioekin lan egiten dugu
 (etxeko ehungintzekin eta jantziekin)
 TARIFA BEREZIAK!**



Gabi
 jatextea
943 741 230
 Ondo pasa
 Errosario kaleko jaietan!





Ikusmin handia piztu zuen lehia jokatu zuten Errosario kaleko jaietan, duela 30 urte, 1993an. Fernando Uriarte *Olimpic* zenak eta Reyes Azkoitia (Azkoitia, 1952) pilotariak elkarren aurkako partida jokatu zuten Kalegoen plaza ikuslez gainezka zela. Azkoitia bide urratzailea izan da emakumezkoen pilotan eta kirolzale amorratua eta saltsa askotariko perrexila izan zen *Olimpic*. Partida jokatu zutenean 42 urte zituen Azkoitiak eta 59 urte Uriartek. Lehia estu baten ostean, 22-18ko emaitzarekin gailendu zen elgoibartarra. Juanito Gorostiza (♣) izan zen lehia bitxi haren sustatzailea. Gorostiza harro zegoen Errosario kalean jaio izanaz [Errosarion bertan eduki zuen bere familiak Gorostiza taberna mitikoa ere, 40 urtez], eta horregatik gorputz-arima aritzen zen kaleko jaien antolakuntzan. Hainbat urtean ekarri zituen, adibidez, Iparraldeko pilotariak ere. Goiko argazkian Jose Luis Odria (epailea), Reyes Azkoitia eta Fernando Uriarte (♣).





Sabin Argarate Unzilla

2024ko irailaren 27an hil zen, 91 urte zituela.
Sendiak bihotzez eskertzen ditu jasotako doluminak,
bai eta hileta elizkizunetara agertu izana ere.

Ama lurrak goxo har zaitzala.

Etxekoak



II. URTEURRENA

Maria Alvarez Alvarez

2022ko urriaren 1ean hil zen, 70 urte zituela.
Haren oroimenez II.urteurreneko meza izango da,
domekan, urriaren 6an, 11:00etan, Elgoibarko Bartolome
Deunaren eliz-parrokian. Joango zaretenoi,
aldez aurretik eskerrak.

***Inoiz itzaliko ez den
zeruko izarra bihurtu zara.
Beti gurekin, asko maite zaitugu.***

Etxekoak



ETXEBERRIA

EHORZKETA-BEILATOKIA

943 741 327 (24 orduz)

635 756 295

629 635 203

Santa Klara, 16 - Elgoibar
info@funerariaetxeberria.com
www.funerariaetxeberria.com

Kutxak, trasladoak eta koroak.
Norbanakoei eta konpainiei zuzenduriko zerbitzuak.
Erietxe zentruetan zerbitzuak.

